

c 71/10 . 1984

ARTICLES

DES PLAINTES

ET DOLEANCES DV PEV-

ple, sur lesquelles est fondee

l'occasio de la guerre presente.

M. D. LXVII.

A R T I C L E S

LETTERS

REVIEWS

NOTES

THE NEWBERRY
LIBRARY

Case

F

39

.326

1567a

W. B. LEAH

ARTICLES DES PLAINTES ET DOLEANCES DU peuple, sur lesquelles est fondée l'occasion de la guerre présente.

A Pres deuë protestation faite, de vouloir rendre au Roy, nostre souuerain Prince & naturel Seigneur, l'honneur, obeissance & fuytion qui luy est deuë, sans en rien déroger aux droicts de sa Maiesté : s'ensuiuent aucuns Articles des plaintes & doleances de son peuple, alencontre aucuns de ses pretendus Conseillers & collateraux, perturbateurs du repos public, & abusans indignement de son nom & autorité.

ARTICLE I.

Que contre les remonstrances des Estats generaux, tenus dernieremēt en la ville d'Orleans, & contre tout droict diuin & humain, le Conseil du Roy est rempli de gens ayans serment à vn estranger : comme Cardinaux & Euesques, obligez par sermēt au Pape de Rome, & par consequent dispensez & exempts de la fidelité qu'ils doiuent au Roy : Et outre-

A.ij.

plus est farci de gens diffamez notoirement de tresmauuais mesnage & administration de ses finâces conuerties à leur profit, outre plusieurs exactions faites sur les particuliers, comme sur ceux qui ont pris à ferme les aydes, subsides, & autres deniers, appartenans audit Seigneur.

.I I.

Que certains pretendus Conseillers du Roy, ennemis du repos public, & de l'vnion, concorde & amitie moyennée par les susdicts Estats generaux, entre les suiets du Roy de l'une & l'autre Religion, par la permission de la liberte des consciences, confirmee d'abondant par les Edicts de Ianuier, & de la Pacification: n'ont cessé depuis quatre ans en ça, de corrompre & alterer par moyes obliques lesdicts Edicts: Premièrement, par la declaration de ne prescher à deux lieues de la Cour: qui fut vn artifice notoirement controuué, pour eslongner du Conseil du Roy les Princes & Seigneurs de ladicte Religion: Et depuis par l'Edict de Roussillon, abolissant apertement la plus grande part de ladicte liberte, avec infinies autres restrictions, modifications, & interpretations, faites iournellemēt par les Officiers de iustice, contre la franchise & seureté de ladicte Pacification.

I I I.

Que lesdicts Perturbateurs du repos public, commirent incontinent apres la Pacification, vne infidelité indigne du nom du Roy, dont ils abuserent: faisans declarer par Edict, que le Roy tenoit pour agreable, & comme fait de bon zele & affection au bien de son seruice, ce qui auoit esté fait és autres troubles par ceux de ladicte Religion: Et neantmoins soudainement apres faisans desmanteler les villes qu'ils auoyét tenues, pour y imprimer vne marque perpetuelle de felonnie, desloyauté & rebellion.

I I I I.

Que semblable infidelité fut deslors commise par eux, en despouillant tous ceux de ladicte Religion de leurs armes, tât defensiues, comme offensiues: & mettant esdictes villes, forces & garnisons de gens, armez expressement contre ladicte Religion, & mesmement forces estrâgeres de l'armee des Suisses: comme si le Roy auoit plus de fiance aux estrangers, qu'à ses suiets naturels. Qui est vn creue-cœur insupportable aux bons & loyaux suiets de sa Maieité: principalemét aux Gentilshommes, qui ont tousiours esté louez par dessus tous autres, de fidelité & loyauté.

V.

Que pareille infidelité fut aussi par eux cōmise, en bastissant esdictes villes les forterefes, appellees par aucuns Citadelles, & par les autres Chasty-villains, ou, nids de tyrannie: leur tournans les bouches & adresses de leurs canons, droit au cœur des citez, & les remplifans des plus abandonnez villains & coniurez ennemis de ladicte Religion.

V I.

Que depuis ladicte Pacification, quelques grandes & insupportables oppressions, iniustices, violences & cruautéz, qui ayent esté cōmises par plusieurs Gouverneurs des Provinces, & endurees d'vne patience incroyable par ceux de ladicte Religion: dont les aucuns ont avec cris & lamérations publiques requis & demandé iustice au Roy: toutefois on n'en a iamais tenu conte, quelque remonstrance, requeste & instance que lon en ait peu faire.

V I I.

Que ceux de la maison de Guyse ont tousiours depuis ladicte Pacification, tasché par leurs calomnies, d'imprimer au cœur & entendement du Roy vne fausse persuasion, que les Princes & Seigneurs suiuanz ladicte Religion

ne tendoyent à autre but qu'à la subuersion de son Estat. Dont lesdicts Seigneurs requierent estre ouis en vne libre & generale assemblee des Estats, & en auoir reparation.

V I I I.

Que contre tout droict diuin & humain, sans aucun ordre ni procedure de iustice, & contre les accords & reconciliations moyenees par le Roy entre les maisons de Guyse & de Chastillon: les susdicts Perturbateurs du repos public, ont prattiqué vne conclusion arrestee au plus secret Conseil qui se tienne sous le nom du Roy, de faire mourir les susdicts Princes & principaux Seigneurs suiuan ladicte Religion, & par consequent exterminer tout le reste du peuple tenant icelle Religion.

I X.

Que contre la foy promise par le Roy en la derniere assemblee des Estats generaux, confirmee par les Edicts ci dessus mentionnez, sur la permission de la liberte des consciences: lesdicts Perturbateurs ont attrait l'armee des Suisses iusques aux enuirs de Paris: mis les armes par l'autorité du Roy entre les mains des Parisiens, de la main desquels lon auoit eu tant de peine d'oster lesdictes armes apres les

autres troubles appaisez: Et en outre ordonné
au mesme lieu les monstres generales de la
gendarmerie: de laquelle les bandes conduites
par les Capitaines de la Religion Romaine,
deuoient les faire en armes, & les autres en
robe: argument certain & apparent de l'exe-
cution appareillée de leur mauuaise volonté.

X.

Que sur le poinct de ladicte execution, &
comme le temps & effect de la conspiration
sembloit estre paruenü à sa maturité, le Cardi-
nal de Lorraine, apres plusieurs diligences &
importunitez frustratoirement faites par ci
deuant au Conseil du Roy, de faire signer &
receuoir le Cōcile de Trente par tout ce roy-
aume, fit approcher de Paris le Legat du Pape,
nommé le Cardinal de la Croix, pour y appor-
ter ledict Concile, & le publier par tout. Qui
monstre euidentement, que ledict Cardinal de
la Croix a bien esté la mesche, mais celuy de
Lorraine, la main & le boutefeu de la guerre
presente.

XI.

Que ç'a esté aux susdicts pretendus Conseil-
lers du Roy vne trahison & infidelité par trop
lasche, de publier tant de fois, & encores si
freschement, mandemens, lettres patentes, &
decla-

declarations au nom du Roy, de ne vouloir en rien alterer l'Edict de Pacification, pour endormir par ce moyē les pourcesuiets du Roy, despoillez de toutes leurs armes, & cependant brasser sous main tant de secrettes entreprises, prattiques & machinations de guerre. De laquelle infidelité s'engendre aux cœurs des suiets du Roy, vne perpetuelle desfiance des autres promesses & seuretez publiques, faites ou à faire ci apres en son nom : qui est la chose plus dangereuse & pernicieuse qui puisse auenir à la conseruation d'un Estat.

X I I.

Que sur les troubles auenus au pays de Flandres, estant le peuple dudit pays contraint, pour la Religion persecutee, de se retirer en France, lesdicts Perturbateurs enuoyerēt Lettres expresses par toutes les bonnes villes de ce royaume, pour rechercher diligemment lesdicts Flamens, & iceux contraindre de sortir hors le royaume : Combien que par les anciēs establissemens de ceste Couronne, & notoriété connue par les histoires, le pays de Flandres & Artois soyent dependans de la Couronne de France, & mesmemēt celuy de Flandres, qui est Pairie ancienne de ceste Couronne : Faisans par ce moyen iceux Perturbateurs

B.j.

acte contraire, & derogant au droit du Roy qu'il a audict pays de Flandres & Artois: pour les habitans duquel pays iamais nos Rois ne furent conseillez d'ottroyer lettres de naturalité, comme n'en ayans besoin: par ce qu'ils estoient tenus pour François naturels, & de droit suiets au Roy.

X I I I.

Que le Roy en son bas aage est accompagné de gens vicieux & mal conditionnez, qui luy donnent vn tresmauuais exemple & instruction: tellement que lon ne vit onques la Cour plus abandonnee à toutes dissolutions, villenies, blasphemies, & renoncemens de Dieu. Ce qui se fait expressement, & tout notoirement, afin que le Roy n'encline aucunement à suiure ou fauoriser la Religion reformee, comme celle qui deteste & condamne telles dissolutions, indignes de la Cour d'un Prince, portant le nom de Treschrestien: & pres la personne duquel, principalement en son bas aage, lon deust tenir personnages graves, vertueux, & de bonne vie, pour en recevoir bonne & salutaire instruction.

X I I I I.

Que nonobstant la promesse du Roy, faite

aux derniers Estats generaux (article cxxi.) de soulager ses suiets des tailles & impositiōs extraordinaires, & reduire le tout à l'estar, qui fut au temps du Roy Loys xii. toutefois on les accroist & augmente tous les iours, & de telle sorte, que chacun s'esbahit que peut deuenir vn si grand amas de finances, veu que (graces à Dieu) nous n'auons eu depuis ce regne aucune guerre estrangere.

XV.

Qu'encores que le Roy soit dès son aduenement à la Couronne, tombé en vn abyſme de debtes, plus grandes ſans comparaiſon, que ne furēt onques debtes d'aucun Roy de France, faites & créées par la mauuiſe conduite & inſatiable auarice de ceux de la maiſon de Guyſe, qui ont entierement poſſedé les deux Rois precedens, avec leurs coffres & fināces: & que tous les iours on forge & inuēte mille artifices nouueaux de daces, emprunts, ſubſides & gabelles: Toutefois il n'eſt aucunement ſatisfait à ſes creanciers, ains eſt l'argent du peuple employé en deſpēſes exceſſiues, voyages inutiles, baſtimens ſuperflus, farceries & comedies de grandes deſpenſes, donations immēſes, & autres prodigalitez deſmeſurees.

X V I.

Que les Italiens ont gaigné tel credit & faueur en la Cour par leurs subtilitez & inuentions artificielles de leuer argent du poure peuple, que les François ne semblent, au prix d'eux, que gens aubeins & estrangers, ne trouuans plus les faueurs accoustumees de leurs anciens Rois : dont l'vn, qui fut Philippes le Bel, par Edict expres de l'an CCCXLVII. bannit lesdicts Italiens & Lombards hors de son royaume, comme larrons & expilateurs du bien public.

X V I I.

Que les honneurs & grans estats de ce royaume sont ordinairement deferez à gens indignes & insuffisans, & mesmement l'ordre de Cheualerie royale (laquelle est coniointe avec l'honneur & titre de frere de Roy) donné à gens qui ne porterét iamais armes qu'en peinture: & qui plus est, à gens sortis de condition vile, abiecte, & non exempt de ignominie.

X V I I I.

Que tous estats & offices, tant de iustice que de finances, & autres, iusques à la gendarmerie & place des ordonnances du Roy, sont vendus publiquement en la Cour, comme en vne foire & marché public, non seulement

contre tout droict diuin & humain, mais aussi
contre l'ordonnance & promesse du Roy fai-
te en la derniere assemblée des Estats tenus à
Orleans.

X I X.

Que les Conseillers des Cours de Parle-
ment, & autres Officiers de iustice, font dès
leur reception & entree, entachez d'un villain
& infame periurement: faisans en lieu & as-
semblée publique, sermēt solennel sur la dam-
nation de leurs ames, de n'auoir iamais rien
promis, baillé, ni fait bailler, de ce qu'ils ont
tout notoirement acheté à deniers contens.

X X.

Que lesdits Officiers, pour se rembourser
parapres de leurs deniers, prennent argent, sa-
laire & espices de toutes leurs procedures: &
par ce moyen vendent en detail ce qu'ils ont
acheté en gros: rendent les proces immortels,
& acquierent en peu de temps richesses in-
croyables par le trafic & marchandise qu'ils
font publiquement de la iustice.

X X I.

Que par ceste damnable & detestable cou-
stume de vendre les estats de iustice, infinis
ieunes hommes se confians sur la bourse de
B.iiij.

leurs peres , ou en la leur propre , ne s'appliquent à aucun exercice de vertu ni de sauoir, ains sans aucune doctrine ou experiëce achemtent les grans & honorables Estats , comme Maistrises des requestes & autres : & par ce moyen , sans auoir passé par les degrez d'offices inferieurs , volët d'un plein saut par dessus les plus dignes & plus anciens Conseillers des Parlemens, desdaignans par ce moyen les gës de sauoir & longue experience.

X X I I.

Qu'une grande partie de la France fait estat & exercice de proces & prattique , viuant indignement d'iceluy, comme d'un train & trafic de marchandise: tellemēt qu'au lieu de peu de gens, qui pourroyent aisément y fatisfaire, lon voit toutes les villes & villages farcis de pratticiens, aduocats, procureurs, clerks, solliciteurs, commissaires, greffiers, huissiers, notaires, tabellions, sergens, & autres semblables officiers , qui ne vivent que des proces & debats semez , ou nourris par leurs artifices, entre les parens, voisins , ou autres bourgeois & habitans desdictes villes.

X X I I I.

Que cest chose ignominieuse à nostre na-

tion , repugnante aux mœurs de nos maieurs,
& dangereuse pour la conseruation de l'Estat,
de mettre les gouuernemés des villes & Pro-
uinces de frontiere entre les mains des Ita-
liens , ou autres estrangers : comme s'il ne re-
stoit de toute la Noblesse de France , person-
nage de fidelité , loyauté & suffisance , pour y
estre employé.

X X I I I I.

Que les Edicts & mandemens du Roy sont
legerement changez, alterez, & reuoquez: &
par ce moyen le Conseil du Roy taxé entre les
nations estranges , d'inconstance & legereté,
pernicieuse sur tout en matiere de loix & or-
donnances de la chose publique.

X X V.

Que depuis quatre ans ençà on a veu ordi-
nairement, & principalement és affaires con-
cernantes ceux de la Religion , courir Lettres
du cachet, contraires aux Lettres patentes: d'ot
est venu le prouerbe commun, que nous auïos
vn Roy du seau, & vn autre du cachet : au lieu
que par anciennes ordonnances est defendu
d'auoir esgard és affaires d'importance, aux
Lettres du cachet.

Ces choses considerees , le Peuple supplie
treshumblement le Roy , son Prince naturel
& souuerain Seigneur, vouloir suiuant la bon-
té, clemence, benignité, & ancienne coustume
& obseruance de ses ancestres, ordonner qu'il
soit mis ordre & remede conuenable à telles
confusions : à l'honneur de Dieu , à la conser-
uation de sa royale Maiesté, & au soulagemēt
de ses pources suiets.

FIN.

Case F

39. 326

1567a

THE NEWBERRY
LIBRARY